



Termu Referénsia

Kompetisaun Ensaiu Refletivu

Kompetisaun hakerek bazeia ba Kolesaun Arkivu Centro Chega!l.P

Nú. 24/ToR/DPM/III/2025

I. Makloke

Centro Nacional Chega!l.P (Centro Chega!l.P) harii ho misaun atu sai hanesan *Centro Post-Confliito* ne'ebé prezerva memória pasadu hodi promove direitu no valór umanu nian. Misaun ida-ne'e atu hatan ba vizaun Centro Chega!l.P nian katak harii sosiedade inkluzivu, la repete istória moruk pasadu nian, moris iha dame no respeito ba direitu umanu (Dekretu-Lei N°48/2016).

Dezde tinan 2022 Centro Chega!l.P servisu hamutuk ho UNESCO no suporta husi KOICA realiza projetu *Digitalization of CHEGA National Center for Conflict Reconciliation and Peacebuilding in Timor-Leste* ho objetivu atu bele prezerva no transmite memória no istória Timor-Leste nian hodi kria kultura dame nu'udar forsa motriz ba nasaun ninia rekonsiliaun, rekonstrusaun no dezenvolvimentu sustentável.

Iha tinan ida-ne'e nu'udar parte ida husi projetu refere, Centro Chega!l.P apoiu husi UNESCO no KOICA realiza kompetisaun ensaiu refletivu bazeia ba kolesaun arkivu Centro Chega!l.P nian. Kompetisaun ida-ne'e partikularmente loke ba juventude sira.

Tipu ensaiu refletivu mak tipu hakerek personal ida ne'ebé explora autór nia hanoin, ninia sentimentu, no esperiénsia sira kona-ba asuntu partikulár ida, dala barak halo ligasaun entre hanoin pesoál no tema ne'ebé luan liu. Normalmente ida-ne'e envolve auto-ezame kriticu no introspesaun. Tuir *The Norton Field Guide to Writing* husi Richard Bullock et al. (2022), ensaiu refletivu mak ensaiu ne'ebé "*hatee fali ba esperiénsia ida, analiza ninia signifikadu, no esplika saida mak bele aprende husi ida-ne'e.*"

Tan ne'e liuhusi kompetisaun ida-ne'e espera atu joven sira bele hatee halo kontaktu ho esperiénsia sira vítima no sobrevivente sira-nia esperiénsia liuhusi testemuña sira mak Centro Chega! rai hela, koko komprende ninia signifikadu, reflète saida mak bele aprende husi esperiénsia moruk sira ne'e. Nune'e liuhusi kompetisau ida-ne'e Centro Chega!l.P hakarak enkoraja joven sira atu explora istória, komprende ninia impaktu, no reflète kona-ba ninia relevánsia iha sira-nia moris ohin lora nian.

II. Objetivu

Objetivu sira husi kompetisaun ida-ne'e mak:

- Hasa'e interese no konxiénsia jersaun foun sira nian ba arkivu nu'udar fonte ba istória no aprendizajen.
- Enkoraja pensamentu kriticu no refletivu kona-ba istória violasaun direitu umanu iha Timor-Leste.
- Haburas ábitu hakerek sientífiku no refletivu bazeia ba fonte primária sira.
- Prodús ensaiu ho qualidade ne'ebé bele publika nu'udar matéria educativa ba pública.

III. Tema

Tema prinsipál ba kompetisaun ida-ne'e mak: "*Aprende husi Istória: Reflesaun foin-sa'e nian kona-ba violasaun direitu umanu iha pasadu.*"

IV. Partisipante

Kompetisaun ida-ne'e loke ba joven sira husi Timor-Leste iha kategoria sira tuir mai ne'e:

- Estudante universitáriu.
- Estudante eskola sekundária.
- Juventude ein jerál ho idade tinan 16-35 ne'ebé iha interese ba istória.

V. Mekanizmu kompetisaun nian

5.1. Rejistu

Untuk rejista hodi partisipa iha kompetisaun ida-ne'e konkorente sira tenke halo tuir mekanizmu tuirmai:

- Submete abstratu ensaiu nian (ka rezumu) ho liafuan másimu 250 ba iha Divizaun Prezervasaun no Memorializasaun (DPM).
- Abstratu tenke bazeia ba Relatóriu Chega! nu'udar referensia prinsipál.
- Prese formuláriu rejistrasaun nian.
- Prese formuláriu aseitasaun katak sei hakarak partisipa iha formasaun no diskusaun ka semináriu sira mak realiza iha ámbitu kompetisaun ida-ne'e.

5.2. Selesaun ba abstratu (rezumu) no lista badak

- Hafoin simu abstratu (rezumu), ekipa juri sei halo selesaun ba abstratu sira no prodús lista badak (*short list*) bazeia kritériu mak iha no deside lista badak (*short list*).
- Konkorente ne'ebé pasa ba iha lista badak másimu na'in 25.

5.3. Workshop

Konkorente sira ne'ebé pasa ba iha lista badak (*short list*) sei parsitipa iha *workshop* durante loron ida ho materia sira hanesan tuirmai:

- Introdusaun ba arkivu Centro Chega!.P.
- Prosedimentu padronizada asesu ba iha Arkivu Centro Chega!.P.
- Peskiza arkivistika.

Konkorente ne'ebé mak la partisipa iha *workshop* sei konsidera retira ona husi kompetisaun.

5.4. Peskiza

Hafoin remata *workshop*, partisipante sira hahú halo peskiza ba iha arkivu haktuir prosedimentu padronizadu asesu nian ne'ebé aplika iha Arkivu Centro Chega!.P.

5.5. Ensaiu kompletu

Durante ka hafoin peskiza iha arkivu, konkorente sira prepara ka hakerek ninia ensaiu kompletu ho kriteiru tuirmai:

- Ensaiu nia naruk: palavra 1.500 to'o 2.500.
- Hakerek ho lian tetun.
- Uza formatu akadémiku ho referénsia ne'ebé klaru.

5.6. Prazu submisaun ensaiu kompletu

Enesaiu kompletu sei submete iha loron 30 fulan-Jullu 2025.

5.7. Avaliasaun

Hafoin prazu submisaun remata, ekipa juri sei avalia ensaiu sira bazeia kriteriu ne'ebé iha.

5.8. Anúnsiu ba Manan-na'in:

Manan-na'in sira sei fó sai iha pájina ofisial Centro Chega!.P

5.9. Semináriu/diskusaun

Manan-na'in sira sei apresenta ka sai hanesan oradór ba iha semináriu no diskusaun sira ne'ebé Centro Chega! organiza iha ámbitu kompetisaun ida-ne'e.

VI. Kriteriu avaliasaun

6.1 Kriteriu avaliasaun ba abstratu

Kritéria ba avaliasaun abstratu mak hanesan tuirmai:

- Konformidade ho tema (25%).
- Klareza kona-ba problema no objetivu hakerek nian (20%).
- Kualidade argumentasaun no orijinalidade ideia (20%).
- Uza Relatóriu Chega! nu'udar baze (20%).
- Sistematika (15%)

6.3 Kritériu avaliasaun ensaiu kompletu

- Konformidade ho tema (20%).
- Utilizasaun arkivu Centro Chega!.P nu'udar fonte primária (20%).
- Orijinalidade no kreatividade iha reflesaun (20%).
- Kualidade análise no argumentasaun (20%).
- Sistematika, estrutura no koherensia (20%).

VII. Kalendáriu

Data	Atividade
30 Abril 2025	Loron ikus rejistu no submisaun abstratu (rezumu)
16 Maiu 2025	Anunsiu lista badak (<i>short list</i>)
23 Maiu 2025	<i>Workshop</i>
30 Juñu 2025	Loron ikus submisaun ensaiu kompletu
17 Jullu 2025	Anunsiu manan-na'in

Kalendáriu ida-ne'e sei bele iha mundansa, bainhira iha mudansa mak Centro Chega!.P liuhusi divizaun relevante sei halo anunsiu públiku.

VIII. Prémio

Kompetisaun ida-ne'e fornese prémio hanesan tuirmai:

- Primeiru lugar: \$ 1.000.00 USD.
- Segundu lugar: \$ 750.00 USD.
- Terseiru lugar: \$ 500.00 USD.

Partisipante sira seluk sei hetan sertifikadu apresiasaun no oportunidade atu ninia ensaiu bele inklui iha publikasaun livru ne'ebé Centro Chega! prodús.

IX. Fonte orsamentu


Realizasaun atividade kompetisaun ensaiu refletivu ne'e finansia husi orsamentu doador UNESCO liuhusi *projeto Digitalization of CHEGA National Center for Conflict Reconciliation and Peacebuilding in Timor-Leste* nian ne'ebé mak jere husi DCRM.

X. Maktaka

Centro Chega!P espera kompetisaun ida-ne'e hein atu hasa'e konxiénsia jersaun foun sira nish kona-ba importánsia husi arkivu istóriu no dezenvolve tradisaun reflesaun kriticu sira kona-ba pasadu. Centro Chega!P konvida juventude Timor-Leste tomak atu partisipa iha esforsu hamutuk hodi prezerva memória istórica ba futuru ne'ebé di'ak liu.

Dili, 26 Marsu 2025


Prepara husi:



Yazalde Manaka Savio

Diretor DPM

Aprova husi:



Hugo Maria Fernandes

Diretor Ezekutivu

Anexu: Giaun hakerek ensaiu refletivu

Estrutura husi ensaiu refletivu ida normalmente kompostu husi parte prinsipál tolu: introdusaun, korpu ka konteúdu, no konkluzau. Relevante ho kompetisaun ida-ne'e, ninia konteudu sira ita bele espelika detalla hanesan tuirmai.

1. Introdusaun

- Introdús tópiku ka akontesementu iha pasadu ne'ebé Ita-Boot hakarak reflète.
- Esplika tansá tópiku ka akontesementu ida-ne'e importante ka iha signifíkadu ba ita-boot.
- Hakotu ho deklarasaun ida ka teze ida ne'ebé rezumu ita-boot ninia reflesaun.

2. Konteúdu (Sesaun Reflesaun Prinsipál)

Sesaun ida-ne'e kompostu husi parágrafu oioin ne'ebé deskreve ita-boot nia reflesaun. Estrutura sira ne'ebé bele uza:

a) Deskrisaun kona-ba akontesementu ida

- Deskreve saida mak akontese, bainhira, no iha ne'ebé.
- Se mak envolve no oinsá ita-boot envolve?

Deskrisaun ida-ne'e tenke halo bazeia ba arkivu no referensia suportivu sira seluk.

b) Reflesaun pesoál

- Oinsá ita-boot nia sentimentu, hanoin no reasaun sira ba iha akontesementu?
- Saida mak ita-boot aprende hosi akontesementu ka esperiénsia pasadu ne'e?

c) Análize ho konseitu ka teoria sira

- Dada esperiénsia hodi liga ho teoria sira, konseitu akadémiku sira, ka perspetiva sira seluk ne'ebé relevante.
- Oinsá akontesementu ida-ne'e muda ita-boot nia komprensaun ba realidade ne'ebé mak Ita-Boot moris ba?

d) Implikasaun no lisaun mak sai lisaun aprendijazen iha futuru

- Oinsá reflesaun ba esperiénsia pasadu ida-ne'e influencia Ita-Boot nia atitude ka asaun sira iha futuru.
- Saida mak Ita-Boot sei halo diferente iha futuru?

3. Konkluzau

- Halo rezumu ba pontu prinsipál sira husi Ita-Boot nia reflesaun.
- Deskreve impaktu tempu naruk husi reflesaun ba Ita-Boot nia an rasik.
- Bele remata ho pergunta refletivu ida ka konvida leitor sira atu hanoin kle'an liután.

Ita-boot mós bele aumenta referénsia sira husi fonte sira ne'ebé suporta ita-boot nia análize.